

et è venuti zoso li 50 fanti, che non li videnò, ma si havesse fanti fariano *etc.*; e si mandì danari per quelle zente.

Fo scritto, per Colegio, a Udene, confortandolo non semo per manchar ogni sussidio in quella Patria, et che remetevemo la opinion et defension a l'horò, et che col papa stemo ben, qual mandemo li sumarij.

164* *Di Istria, di sier Andrea Zivran, proveditor, date a dì 13 da Citanova.* Chome hessendo stato a custodia dil castel di Rozo, dil qual dubitava, vedendo non aproximasse niuno, fe' una coraria sopra il teritorio di lo Poglavo soto il qual luogo fono presi do cavalli erano ussiti fuora dil dito loco, poi fata la coraria andò a Montona, dal qual locho havendo fato ussir alquanti di quelli subditi, di ritorno condusseno tre de Pisim fati presoni sopra el suo teritorio, i qualli examinati, disse esser in Pisim cavali 150 de corvati dil conte Anzolo, tra i quali sono da cavali 40 boni et lo resto paesani, e ch' el capitano de Pisim havendo mandato a Galignana e Pedena per haver vituaria per diti cavali et homeni, li è stà risposto non volerge dar, ni haverne, et quelli li hanno fato venir nel paese li proveda dil viver, il che inteso per dito capitano di subito mandò per i zupani di diti do lochi et quelli fece impresonar et che per forza li tole el viver. *Item*, dicono non esser vituarie in Pisim, et che con fatica danno l'erba a li soi cavali, et che diti corvati hanno deliberato far una coraria sopra el teritorio di Montona e altri lochi de la Signoria nostra. *Item*, scrive atrovarsi *solum* con cavali 40, perchè i altri stratoti sono andati a robar *juxta* il solito, i qualli non li prestò obedientia, perhò non pol far nulla; è venuto a Parenzo per far cargar le artelarie in barcha ma non ha trovato barche apte, et è venuto li a Citanova per trovar barche, dove à trovà domino Damian di Tarsia et ha parlato di haver Castelnovo, li à risposto esser dentro uno rebello nostro con el qual potendo parlarli judicha sarìa bon mezo ad averlo, l'ha persuaso resti di li, et li ha dito voler venir a li piedi di la Signoria nostra *etc.*

Di Chioza, dil podestà, di eri. Dil zonzer fanti et alcuni di Babin di Naldo et li à mandati a la volta di Monte Alban e dicono ne vien di altri di Ravena di tal compagnia. *Item*, le barche armate l'ha mandate al capitano di Po.

Dil proveditor di l'armada, date a Chioza do lettere. Per una voria barche e armada menuta e andar a brusar Arian e Comachio che molto infesta li subditi nostri, et carga quelli non brusò Co-

machio *etc.* Per l'altra come la note si leverà con do galie, à in conserva, *videlicet* Capella et Ema et anderà sopra le boche di Po, *juxta* le lettere scritoli.

Noto, hessendo spazà li 4 ganzaruoli, fo ordinato et scritto a Chioza li drizano al capitano di Po con hordine se intendi col proveditor di l'armada di operarli dove meglio li parerà, e scritto al dito capitano vadi con le barche verso il Polesene ajutando le rive *etc.*

Di Gnagni Pincon, contestabele, date in Campo a San Bonifazio. Chome al presente ha *solum* fanti 300 e pocho più, e lui non è pezo di altri, stato a Treviso, Padoa, Vicenza *etc.* voria esser equal con li altri, *juxta* la sua condition.

165 *Di Campo. Vene lettere di sier Piero Marzello, proveditor, date in San Bonifazio, a dì 15, hore 22.* Come il proveditor Griti è andato a Lignago, ricevuto alcune lettere nostre, risponde: et a quella di esser contenti dar monsignor di Bonvexim a l'incontro di Zuan Paulo Manfron à spazato uno trombete con questo hordine a Verona, acciò fazi venir il Manfron a Verona e la Signoria farà venir el Bonvexim in Campo, li ha risposto farano, et quel governador francese à scritto di zio al gran maistro. *Item*, dil zonzer li in Campo domino Andrea Vendrami di Bologna con homeni 400. *Item*, manda una deposition de uno suo explorator, la qual sarà posta qui soto. *Item*, si provedi di danari per quelle zente, perchè le cosse nostre va mal non si provedendo, et ha preparato domino Lodovico di San Bonifazio et Nicolino da Dresano con le compagnie l'horò per mandarle sul Polesene, achadendo che pur de li inimici fano operatione da stimar assai *etc.* Domino Lucio è andato li.

Riporto di uno explorator expedito domenica proxima 12 di l'istante, e venuto questa mattina 15 dito in Campo nostro.

Nara haver visto a Hostia nave da far ponti sopra cari drio Po numero 49, in Mantoa vete el gran maistro con cavali 300 disarmati et disnò in castello con madona marchesana. *Item*, ch' el vete boche 36 di artelarie tra le quale è una grossissima.

Item, fantarie sguizare 6000, vasconi et spagnoli 4000, quali el vete passar da Hostia et Revere fina a Governolo dove luni alozorono per quelli contorni, le qual fantarie sono venuti per Po con nave 38. *Item*, che l'ha visto da zercha 400 vastadori, ma ch' el se dicea erano mazor numero assai. *Item*, che